



Bosnia and Herzegovina  
Federation of Bosnia and Herzegovina

**CANTON SARAJEVO**  
Ministry of Health

Na osnovu člana 70. st. (1) i (2) Zakona o organizaciji organa uprave u Federaciji BiH („Službene novine Federacije BiH“, broj 35/05) i člana 6. stav (1) Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH br. 44/12, 23/13, 27/14 i 33/19), prijedloga Komisije za pripremu Odluke o slobodnim lokacijama za osnivanje apoteka za 2024. godinu na području Kantona Sarajevo, Ministarstvo zdravstva Kantona Sarajevo donosi

**ODLUKU**  
**o slobodnim lokacijama za osnivanje apoteka za 2024. godinu na području**  
**Kantona Sarajevo**

**I**

Ovom Odlukom definišu se slobodne lokacije na području Kantona Sarajevo za 2024. godinu, za osnivanje apoteka, u skladu sa demografskim i geografskim kriterijima utvrđenim Pravilnikom o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, br. 44/12, 23/13, 27/14 i 33/19) (u daljem tekstu: Pravilnik), te dostavljenim podacima i zahtjevima mjesnih zajednica i općina sa područja Kantona Sarajevo za apotekarskom službom, kao i potrebama kantona za apotekarskom službom.

**II**

U skladu sa utvrđenim kriterijima propisanim čl. 3. i 4. navedenog Pravilnika, te dostavljenim podacima i zahtjevima mjesnih zajednica i općina sa područja Kantona Sarajevo za apotekarskom službom, kao i potrebama kantona za istom, Ministarstvo zdravstva Kantona Sarajevo, utvrđuje slobodne lokacije za osnivanje apoteka za 2024. godinu i to:

1. Općina Centar - za područje MZ Betanija (3400 stanovnika) - 1 apoteka;
2. Općina Centar - za područje MZ Marijin dvor TC Sarajevo City Centar - 1 apoteka;
3. Općina Novo Sarajevo - za područje MZ Pofalići II (5200 stanovnika) 1 apoteka;
4. Općina Novi Grad Sarajevo - za područje MZ Otoka (4166 stanovnika) ul. Brčanska i Žrtava fašizma 1 apoteka;
5. Općina Ilidža - za područje MZ Stup II JP Međunarodni aerodrom Sarajevo - 1 apoteka;
6. Općina Ilidža - za područje MZ Stup naselje Bulevar (6353 stanovnika) - 1 apoteka;
7. Općina Ilidža - za područje MZ Blažuj TC West Gate - 1 apoteka;
8. Općina Vogošća - za područje MZ Hotonj (7500 stanovnika), ul. Donji Hotonj, Branilaca Hotonja i Orahov brijeg - 1 apoteka;
9. Općina Trnovo - za područje MZ Babin do - 1 depo apoteka;
10. Općina Ilijaš - za područje MZ Mrakovo (2856 stanovnika) - 1 depo apoteka;

### III

Međusobna udaljenost između dvije apoteke ne može biti manja od 400 metara najbliže cestovne povezanosti, a koja se utvrđuje geodetskim izmjerom ovlaštene osobe za obavljanje geodetskih poslova shodno važećim propisima iz ove oblasti.

### IV

Na podnijeti prethodni zahtjev osnivača buduće apoteke ili budućeg nositelja odobrenja za privatnu praksu, Ministarstvo zdravstva Kantona Sarajevo će izdati pisanu saglasnost da se na toj lokaciji može osnovati apoteka.

Zahtjev osnivača buduće apoteke ili budućeg nositelja odobrenja za privatnu praksu se dostavlja u roku od 15 dana od dana stupanja na snagu ove Odluke.

### V

Osnivač buduće apoteke ili budući nositelj odobrenja za privatnu praksu kojem je izdata saglasnost na lokaciju dužan je podnijeti zahtjev za osnivanje apoteke s potpunom dokumentacijom, shodno Pravilniku, najkasnije tri (3) mjeseca od dobijanja saglasnosti.

Ukoliko u roku utvrđenom u prethodnom stavu budući osnivač ili budući nositelj odobrenja ne podnese Ministarstvu zdravstva zahtjev sa potpunom dokumentacijom za osnivanje apoteke u skladu sa Pravilnikom, ista će se poništiti i izdati drugom podnositelju sa rang liste koji ispunjava kriterije utvrđene ovom Odlukom.

Budućem nositelju odobrenja za privatnu praksu, odnosno budućem osnivaču apoteke na lokacije utvrđene u tački II Odluke o slobodnim lokacijama se može izdati samo jedna prethodna saglasnost.

### VI

U slučaju nerentabilnog poslovanja apoteke, Ministarstvo zdravstva Kantona Sarajevo neće izdavati zamjenske lokacije, niti odobrenja za preseljenje apoteke, niti će snositi bilo kakvu odgovornost za izdatu prethodnu saglasnost za lokacije utvrđene u tački II ove Odluke, obzirom da su iste utvrđene na osnovu zahtjeva mjesnih zajednica i općina sa područja Kantona Sarajevo, a odobrene po slobodno uloženom zahtjevu.

### VII

Ova odluka stupa na snagu narednog dana od dana objave u „Službenim novinama Kantona Sarajevo“, a objavit će se na i na web stranici Ministarstva zdravstva Kantona Sarajevo.

## O b r a z l o ž e n j e

U skladu sa članom 6. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, br. 44/12, 23/13 i 27/14), kantonalno ministarstvo zdravstva, određuje slobodne lokacije na kojima će se osnivati apoteke.

Pored demografskih i geografskih kriterija utvrđenih u čl. 3. i 4. pomenutog Pravilnika, Ministarstvo zdravstva je cijenilo potrebe kantona i lokalnih zajednica za apotekarskom službom sa aspekta potreba stanovništva, uzimajući u obzir ukupan broj stanovnika tog lokaliteta i postojeći broj apoteka, te saobraćajnu povezanost apoteke i dostupnost stanovništvu, kao i određene statističke podatke vezane za tržne centre, aerodrom Sarajevo (broj stalno uposlenih, broj dolazećih i odlazećih putnika aerodroma, broj posjetitelja centra i gostiju hotela itd).

Prilikom dodjele prethodne saglasnosti budućim nositeljima odobrenja za privatnu praksu, odnosno budućim osnivačima apoteka, Ministarstvo zdravstva će cijeniti zapošljavanje lica koja se vode na evidenciji JU Služba za zapošljavanje Kantona Sarajevo, odnosno samozapošljavanje i pokretanje start up poslovnog subjekta, položaj apoteke, odnosno udaljenost apoteke u odnosu na ambulantu, dostupnost stanovništvu buduće apoteke sa aspekta radnog vremena, garanciju o pružanju usluga najmanje 5 godina bez prava prenosa osnivačko-vlasničkih prava na druga pravna i fizička lica, udaljenost od najbliže postojeće apoteke, a koja ne može biti manja od 400 m cestovne udaljenosti, kao i dostavljanje dokaza o posjedovanju poslovnog prostora na traženoj lokaciji.

Ukoliko osnivač budućeg ogranka apoteke već posjeduje PZU na području Federacije BiH/BiH i/ili je pružao farmaceutsku uslugu na području Bosne i Hercegovine/Federacije BiH, Ministarstvo zdravstva će cijeniti dosadašnje iskustvo, odnosno zadovoljstvo korisnika uslugama najmanje za dvije posljednje godine rada apoteke, posebno od dobavljača i Zavoda zdravstvenog osiguranja Kantona Sarajevo.

Ukoliko na istoj lokaciji bude više zaprimljenih zahtjeva budućih nositelja odobrenja za privatnu praksu, odnosno budućih osnivača apoteka koji ispunjavaju sve kriterije, odlučivat će se prema utvrđenim kriterijima za dodjelu slobodnih lokacija, koje će definisati ministarstvo.

Imajući u vidu naprijed navedeno odlučena je kao u dispozitivu ove Odluke.

Broj: 10-04-931/24  
Sarajevo, 22.03.2024. godine



Adresa: Reisa Džemaludina Čauševića 1, 71 000 Sarajevo  
Tel: + 387 (0) 33 562-104, Fax: + 387 (0) 33 562-243  
Web: <http://mz.ks.gov.ba>, E-mail: [mz@mz.ks.gov.ba](mailto:mz@mz.ks.gov.ba)

3/3

